



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 10

Ronaldo-i Pele indang record ajangtetogo

TAPAK 8

S Africa COVID ya UK nung aliba dang tamajungba: Hancock

VOL. XVIII NO. 81 (ADOK 81) DIMAPUR

SANGTENNÜ (TUESDAY) AENJETI (JANUARY) 05, 2021

₹ 5.00

COVID-19 Nagaland: Taneptsü angur 96.78% kümogo

Kohima, January 4 (TYO): Hombarnü Nagaland nung COVID-19 aliba puteter dang nungibo taneptsü angur timba liasü.

"Tanü nisung 5 dak COVID-19 aliba putet. Parnokji Dimapur o Kohima nung anana (2) aser Mon nung 1 lir. Maneni, Kohima nungi nisung 9 taneptsü angu" ta Health & Family Welfare Minister, S Pangnyu Phom-i metetdaksü.

Nisung 11,935 rongnung parnok 11,551 taneptsü nguogo, ta Minister Pangnyu-isa ashi.

Hombarnü nisung 9 taneptsü anguba züngsema Nagaland nung taneptsü angur 96.78% kümogo, ta paisa shisem.

"Nagaland nung COVID-19 puteter nisung 79 tashi süogo. Tasürtem rongnung parnok 69 coronavirus ajanga aser 10 tanga timtem ajanga asü," ta Health & Family Welfare Department Director, Dr Denis Hangsing-i metetdaksü.

Nisung 132 tashi tanga state temi ogo, ta paisa shisem.

District balala nung COVID-19 putetba: Dimapur (6,404), Kohima (3,715), Mon (604), Peren (502), Tuensang (244), Mokokchung (179), Zunheboto (142), Phek (47), Kiphire (41),

Wokha (39) aser Longleng (18). "Nisung 11,935 rongnung Traced Contacts 4,876, armed forces personnel 4,657, tanga state tem nungi arur 1,836 aser Frontline Workers 566 lir," ta Dr Hangsing-isa ashi.

District balala nung tang anepalurtem: Dimapur (73), Kohima (54), Mokokchung (40), Peren (4), Mon (1) aser Kiphire (1).

"Tang anepalurtem rongnung nisung 20 dak shirangba yima terara lir, ka kanga shiranga oxygen agidar aser 4 ventilators agir. Nisung 148 dakbo shirangba yimya mali" ta Dr Hangsing-isa metetdaksü.

Taneptsü angurtem: Dimapur (6,208), Kohima (3,610), Mon (592), Peren (498), Tuensang (243), Zunheboto (139), Mokokchung (131), Phek (47), Kiphire (39), Wokha (35) aser Longleng (9).

"Nagaland nung COVID-19 alitsü akok ta temlung melemi bilemba sample 1,20,771 tendangogo. RT-PCR ajanga sample 72,556, TrueNat ajanga sample 36,760 aser RapidAntigen Test ajanga sample 11,455 tendang" ta Dr Hangsing-isa metetdaksü.

Dimapur nung 'Speed Limit' latettsür



Dimapur, January 4 (TYO): Commissioner of Police, Dimapur-i Dimapur nung ita ka atema gari senzütsüba 'speed limit' latettsüba osang metetdaksüogo.

January 5, 2021 nungi February 3, 2021 tashi Dimapur Town nungi Chumoukedima tashi garitem 40kms per hour senzütsü. Iba ya MV Act nung Section 112 kübok tetuyuba agütsür, ta Commissioner of Police-i ashi.

Aluyimertem aser Centre maneni tekong merangteper

New Delhi, January 4 (Agencies): Lungkak aitba aluyimer tanishirtem aser Centre sorkar tsüngda tanü agi tenetbenbuba senden amen saka telemtetba tajung ka magiteti tembangogo.

Centre sorkari farm laws tasen asem meyipa magütsü ta tekong meranga noktaker aser parnoki iba atema panel ka tentettsü tebilemba shidang. Ajisüaka, aluyimer teloktemi Act asem meyipa agiang ta takhangba agütsüba nungi masetshii noktaker.

"Onoki ozüngtem meyipa agütsü atema akhangar. Onoki committee ka tentettsüba amala tanga inyakyim kecha

magizüktsü" ta Bharatiya Kisan Union tanishir Rakesh Tikait-i osangbener dang ashi.

Senden nung Union Agriculture Minister Narendra Singh Tomar, Railways, Commerce & Food Minister Piyush Goyal aser Minister of State for Commerce Som Parkash nungertem den farmer unions 40 nungi teshimtet nübotem aden.

Tanü Centre den olemtepba nung tamakok ngura, onoki malls aser petrol pumps shibanger lungkak aitsü. Onoki akhangba nungi masetshii noktaka lir. Farm laws agientsüla ta aluyimertemi metetdaksüogo.

Dzükou lenden morok mi den anogo tenetbuba rarar



January 4, 2021 nü Dzükou Valley nung fire line cutting yangluba angur.

Dimapur, January 4 (TYO): January 4, 2021 nü Dzükou valley nung maparen inyakba meyipa repringshiba senden ka menogo.

Sendenji Kohima Deputy Commissioner aser Chairman DDMA, Mohammed Ali Shihab A IAS menden ser amen aser SP Kohima Manoj Kumar; ADC Kohima Lithrongla Tongpi Rutsa, DFO Kohima Raj Kumar aser tanga ketdangertem aden.

"January 4 tashi nung Dzükou nung mi azüokteta lir. Iba tesem nung fire line cutting kanga junga inyakdar aser India Air Force (IAF) helicopters pezü ajanga tzü shiloktsür. Rangapahar Military Station aser Dimapur Civil Airfield nungi helicopter ananai Bambi Bucket operations inyaker" ta DC & DDMA Chairman Mohammed-i ashi.

Tanü helicopter temi 14 ben tashi tzü litre 28000 shiloktsüogo aser tanü tashi nung sorties 56 asüba nung tzü litre 75000 shiloktsüogo. Asüngnep nungi Air Force-i mi enseptsü atema mapa inyaktü, ta paisa ashi.

IAF ajanga mi lendong azüokteta lir aser asüng tashi nung 100% enseptsü akok ta shiogo. India Air Force-i Nagaland State sorkar, DC Kohima, Indian Army, Dimapur

Civil Airfield, Indian Oil Corporation aser Assam Rifles den yaritepa iba mapa inyaker, ta Kohima DC-isa metetdaksü.

Addl SP Kohima den SDO Civil Jakama nati Khuzama tashi oa Dzükou Valley nung mi lendong atalokba asadangogo. Manipur nungi NDRF personnel den police-ia lendong atalokba yaritepba nguogo, ta paisa ashi.

Hombarnü nisung 78 tashi mi ensepba mapa nung yaritepogo. Parnokji Kohima police personnel 17, 4th NAP personnel 10, Forest 5 aser NDRF personnel 46 liasü. Maneni, asüngnep 5:00 ako nung Viswema Dzükou entry point nungi parnok apusoa aotsü.

Tanü senden amenba sülen Deputy Commissioner Mohammed Ali Shihab-i Commissioner of Nagaland, Rovilatuo Mor IAS den Dzükou Fire osang lemsatep.

Deobar nikongdang miji Dzükou valley leni aru aser iba jagi Range Forest Officer Kohima aser SDPO (South) nati anir teloki ayong ka anasa fire lines yanglu aser tzü shiloktsü, ta Divisional Forest Officer, Kohima, Rajkumar M-i ashi.

Forest Department, NDRF, SDRF, Police aser SAYO volunteers nung Dzükou valley nung mongzüka lir, ta

OSD for Nagaland State Disaster Management Authority (NSDMA) Johnny Ruangmei-ia ashi.

Dzükou valley nung tongtipang tesem kümzüksü atema SDRF, Home Guard & Civil Defence, NDRF, Police & Paramilitary den DDMA, Kohima DFO aser SAYO volunteers-i sobaliba nung beshia aruba ama fire control line yanglur, ta Johnny Ruangmei-isa metetdaksü.

"Onoki maneni fire control line yanglutsü aser NSDMA-i GIS and Remote Sensing, Nagaland den yaritepa UAV (drone) ka amshia teraksa anguba asadangtsü" ta paisa shisem.

CM RIO-i TANÜ DZUKOU VALLEY SEMDANGTSÜ:

Nagaland Chief Minister Neiphiu Rio-i Mongulbarnü tayimtsü ajanga Dzükou Valley nung mi adokba tesem repringdangtsü.

"Iba mi lendong azüoktsü atema anatsülen yaritepa inyakdar. Nagaland tsütsübo mi azüokteta lir," ta Rio-i ashi.

"Dzükou valley nung mi adoker Nagaland aser Manipur nung morok mi aoba asüng ni anüng nungi repringdangtsü" ta Neiphiu Rio-i metetdaksü.

Assam sorkari tetsür kaketshir nem anogoshia Rs 100 agütsütsü

Guwahati, January 4 (Agencies): Sangküm Assembly election agütsü aliba jakdang Assam sorkari tetsür kaketshirtemi anogoshi school-i aotsü atema senotsü teyari agütsütsü sentong renemogo.

"Tetsür kaketshirtem school-i aotsü atema anogoshi Rs 100 agütsütsü" ta education minister Himanta Biswa Sarma-i ashi.

"Sorkari undergraduate aser postgraduate students indang bank

account Rs 1,500 aser Rs 2,000 enoktsütsü. Kaketshirtemi kakets alitsü atema January ita matemdangsa senji enoktsütsü" ta Sarma-isa ashi.

Sangküm state assembly election magidang kaketshirtem atsür arutsü atema sorkari iba mapa ya inyaker ta repranger.

"Onoki taküm küm iba mapa inyaktü sentong liasü saka Covid-19 wara ajanga meinyaktet. Schools aser college-i aoertem

nem sen agütsünür" ta Sarma-isa metetdaksü.

Tetsür kaketshir lakh kati Class XII board examination nung first division nung takok ngura onoki parnok nem maneni two-wheelers agütsütsü, ta paisa ashi.

2020 Class XII board exam nung first division nung takok angur tetsür kaketshir 22,245 nem motorbikes alitsütsü atema sorkari Rs 144.30 crore endoktsü, ta Sarma-isa shisem.

Chozuba Baptist Church kum 125 jungogo; tekülemki tasen ka saya



Noksa temalen- Rev. Dr. Zelhou Keyho, General Secretary, Nagaland Baptist Church Council (NBCC) ajanga December 27, 2020 nü Chozuba Village Baptist Church Quasquicentennial benjongmung nung jembiba angur. Noksa tsünglanglen- Rev. Khrotso Mero, Executive Secretary, Chakhesang Baptist Church Council (CBCC) ajanga December 26, 2020 nü tekülem ki tasenba meshitettsüba angur.

Dimapur, Aenjeti/January 04 (TYO): Chozuba Village Baptist Church tenzüker kum 125 (Quasquicentennial) ajungba benjongmung sentong tuluka December 27, 2020 nü "Great id thy faithfulness" omen nung ajemdaker tekülemki tasenba nung munga liasü, kong Rev. Dr. Zelhou Keyho, General Secretary, Nagaland Baptist Church Council (NBCC) ajanga jubilee nüngshilong sayatsü aser Purhiyi Demo, Chairman, COMS lenisüba kübok iba sentong ya agia liasü.

Quasquicentennial Celebration Committee mendenpuba, Jolayi Nienü-i sangdong ka nung ashiba agi, iba sentong nung Rev. Dr. Zelhou Keyho, General Secretary, Nagaland Baptist Church Council (NBCC) ajanga amangbapurtem den jubilee omen dak ajemdaker Tsüngrem o jembia liasü.

Khristan yimsü agizüka amangba otsü ya asenoki takok balala anguba indang masü saka Tsüngremi asen asoshi kechi inyak, itemji lir. Asen otsü ya Pai asenok tammang tia nungi

anitetba indang lir. Pa otsü ya temeim, taochi indang lir. Pai asenok temeim aser taochi nung yanglu, ta Keyho-i iba sentong nung ashi.

Tsüngrem temeim osang bener arur mezüng missionary tem nükjidadong khenyongi balaka liasü, aser iba yongji tanü asenoki iba nükjidadong nguteter, anungjidang tarutsü putui Tsüngrem temeim indang benjongtsü, ta pai ashi.

Benjongtsü atema kisüng masü saka Tsüngrem mapa maneni inyaksü atema asenok jatet. Asen yimtsüng nung Khristan yimsü arur kum 125 ajungba ya temoatsü tulu aser asenoki tesem ajungalen maneni Pa osang sangdongtsüla, ta Rev. Dr. Keyho-isa ashi.

Iba benjongmung tenzüka sentong nung Chozuba Village Baptist Church senior pastor, Rev. Thepupa Swüro menden liasü, Vekusa Lohe, Chairman, Chozuba Area Baptist Church Council (CABCC) ajanga Tsüngrem temoatsü jazüka sarasadem aser Jolayi Nienü, Chairman, Quasquicentennial Celebration Committee ajanga jubilee munger pelashishia

agizükba o jembia liasü.

Iba jubilee mung indang nungo kaket ya Vipralhou Kesiezie, Board Chairman ajanga saya aser Neisalie Keretsü, Pastor, Khedi Baptist Church ajanga salem o bena liasü.

Iba sentong nung Khedi Baptist Church, Kohima Village indang Men Fellowship, Yorüba Baptist Church Choir, Quasquicentennial Choir aser Local Church Combine Choir ajanga temeja ken tem tena liasü aser Rev. Besütsoyi Demo, Field Director, One Challenge International, Nepal ajanga sarasadema sentong tembang.

Iba jubilee mung sentong nung shilem agir, temolunger aser arogo kwikatisa rongsen aser sarasadem agi yaritepogo, nenok ajak dang pelar aser Tulusang Tsüngrem nem tenüngsang ajunga agütsür, ta Quasquicentennial Celebration Committee aser Chozuba Village Baptist Church ajanga ashi.

Iba benjongmung kisüng masü saka December 26, 2020 nü Rev. Khrotso Mero, Executive Secretary, Chakhesang Baptist Church Council (CBCC) ajanga nisung 2500 mentettsüsa tekülem ki tasen ka meshitetja liasü.

Iba sentong nung Youth Secretary, CBCC Muluvoyi Nienü menden liasü aser Rev. Vesavo Shijo-i anir tekülem aser tetushi agütsüba mapang agi aser Rev. Khrotso Mero ajanga Tsüngrem o lokti dangi bena liasü.

Iba sentong tenzüka Rev. Pitolu Keyho-i sarasadem aser Lhüsetso Shijo, Building Committee Chairman ajanga tarur pela agizükba o jembia liasü.

Sentong nungsa Rev. Hotokhu P. Zhimomi, Executive Secretary, SABAK, Pughoboto ajanga salem o aben. Maneni iba arogo nung Stewards, Bozio Nienü aser Phizolü Nienü aser Quasquicentennial Choir temi temeja ken tena liasü. Sentong tembanga Dapu Küllao, Senior Pastor ajanga sarasadem.

DIPR, Kohima nung Nagaland sorkari adokba calendar angutsü

Dimapur, Aenjeti/January 04 (TYO): Department of Information & Public Relations, Nagaland ajanga adokba Nagaland Calendar 2021 aser Nagaland Diary 2021 ya Directorate of IPR, New Capital Complex, Kohima nung January 4, 2021 nü nungi ayoktsü atema angutsü, ta sangdong ka ajanga ashi.

Tejangrar temi item oset ya Office lapokba mapang sorkari lateta aliba jenjang nung agitsü akok. Sen jenjang

yamai alitsü: Calendar jenjang sen 150 aser Diary jenjang sen 200.

Maneni sangdong danga ka nung, Nagaland Calendar 2021 aser Nagaland Diary 2021 ya Dimapur nunga ayoktsü atema January 5, 2021 nü nungi tenzüka office mapang DPRO, Dimapur indang office nungi angutsü, ta ashi. Tejangrar temi item ya Railway Station (Behind tourist lodge Dimapur) anasa aliba DPRO, Dimapur office nungi alitsü akok, ta sangdong ajangasa ashi.

Medziphema nung COVID-19 vaccination dry run agi



Dimapur, Aenjeti/January 04 (TYO): Nüburtem nem mozü agütsüba sentong tulu ayongzüka agitsü renemshia Medziphema Sub-Division kübok Community Health Center, Medziphema nung January 02, 2021 nü COVID-19 vaccination drive atema dry run sentong ka agia liasü.

CHC Medziphema nung mock drill agiba mapang front line worker nisung 25 nem coronavirus mozü ama yanglua aliba agütsü. ADC Medziphema

Thovisie Phoiji, SDO (Civil) Tokai Sumi, SMO, medical officer pezü aser supervisor kati iba sentong ya mita repranga liasü.

Iba dry run sentong ya session ka nung dang agi saka team balala pongu lemsa. Item team yagi mozü agitsüour nem mozü agitsü indang rasa ashi aser maparen balala inyaka dummy beneficiary indang data bendena liasü. Iba sülen shisatokden senden ka agir sentong tembanga liasü.

UGC ajanga scholarship atema online application mapang atsülangtsür

Dimapur, Aenjeti/January 04 (TYO): University Grants Commission (UGC), Ministry of Education, Government of India ajanga Scholarship atema Online Application indang mapang atsülangtsüogo aser regular aser full time kaketshirtem dang agüja aliba scheme pezü kübok Academic Year 2020-2021 atema applications tasen (renewal densema) meshir: (i) Single Girl Child (SGC) atema Indira Gandhi PG Scholarship (SGC); (ii) University Rank Holder (URH) candidate atema PG Scholarship; (iii) North Eastern Region (NER) atema Ishan Uday Special scheme); (iv) SC/ST candidate tem Professional Courses atema PG Scholarship.

Scheme shia indang guidelines ya 'National Scholarship Portal' nungangutsü. Guidelines nungshia aliba ama temsüa aliba kaketshir shirnok UGC ajanga recognise süa aliba reju nung admission agia ali, parnoki application ya National Scholarship Portal ajanga website- <https://scholarships.gov.in/> nung agütsü akok.

Iba Portal ya 01.09.2020 nungi

lapoka lir aser tsünglanglen mapang apuloktsüba ama 'Fresh' aser 'Renewals' atema application agizüktsü asoshi lapoka alitsü:

Kaketshirtemi online application agütsütsü atema January 20, 2021 ya tatem asütsü. Application meshidak agüja aliba tanaben agütsüshiba densema kaket reju temi application tem tanaben jangjashitsü atema February 5, 2021 ya tatem alitsü.

Kaketshir dang mapang shidak nung online application tem agütsütsü ajungshir, aji asünung dang pei azingba reju temi agüja alima mapang nung application tem jangjashitetsü.

UGC indang Secretary, Prof. Rajnish Jain ajanga December 31, 2020 nü osang ka sangdongba nung, temsüa aliba rejutem dang kaketshir temi Portal nung agütsüba application ya nguli jangjashitsü shiogo.

Kaketshir tem ajungtsü mechi application ajak ya Institution temi January 31, 2021 tashinung jangjashitsüla, anungji dang meshidak aliba application ya tanaben melenshitetsü, ta sangdong ajangasa ashi.



CL John ajanga December 28, 2020 nü Chen Union Aboi "Paan" Morung semzüksüba mapang Chen Union Aboi Town ajanga meranga inyaka iba Morung renemtetba atema tenüngsang agütsü. Iba Morung (PAAN) ya meshiteta Rev. Yeangphong, Pastor ATBC ajanga sarasadema liasü. Chen Union Aboi nem teyari balala agütsüba atema John-isa temeket nung aliba yimtsüngtem aser lenirtem dang pelaba shisem aser ibai alizüng ka tongtetba alitsü, ta ashi.

Bhaba Prasad Chaliha nem Srimanta Sankardev Award 2020 agütsü

Guwahati, January 4 (Agencies): Guwahati kübok Srimanta Sankaradeva Kalakshetra nung Assam chief minister Sarbananda Sonowal-i educationist aser scholar takotet Bhaba Prasad Chaliha nem Srimanta Sankardev Award 2020 agütsü.

Bhaba Prasad Chaliha tenüng nung pa kinungtsü Nandita Chaliha-i iba award agizük.

Iba sentong nung chief minister Sonowal-isa souvenir ka sayaa liasü. Sentong nung adenertem den jembiba mapang, Sonowal-i, alima tesem ajunga nung Assam indang Vaishnavite saint Srimanta Sankardev osang proktsü nükjidong nung, state sorkari Srimanta Sankardev Abhijaan mapatong tejakleni bener aotsü asoshi lemтет, ta ashi.

Chief minister Sonowal-i, "Gurujona indang tesayuba alima ajungalen prokshidaktsütsü asoshi onoki Srimanta Sankardev Abhijaan mapatong tenzüktsü bangjemtep. Iba mission takok angutsü atema ajak dang longjemer inyaktsü asoshi ni ajungshir," ta ashi.

Chaliha indang nung jembiba mapang, Sonowal-i, Bhaba Prasad Chaliha ya "jenjang balaka nung inyakba researcher takotet ka lir," ta ashi.

"Gurujona indang tanela tesayuba, maparen aser taküm libaliro otsü tem nübur dang sangoktsütsü asoshi Prof. Chaliha-i bendanga agüja inyakogo. Iba anogo nung pa anema aliba den arishi talang aser tesünep nung alitsü asoshi ni sarasademtsür," ta Sonowal-i ashi.

Dibrugarh district kübok Naharkatia tesem nung soa intetsang, Bhaba Prasad Chaliha-i researcher ka ama Assam nübur asoshi tongtöbang mapa inyaktsüogo.

Sankari sobaliba tsütsü pai kanga pusemogo. Iba den külemi Chaliha indang research maparen ajanga alimai pa tali jangjaa aktüm.

1999 küm Gauhati University nung Department of Assamese indang tekolakba ama pa mapa nungi anen.

Assam sobaliba aser lokti asoshi pai alakteta shilem tulu agiba asoshi, Assam sorkari Chaliha nem Srimanta Sankardev Award 2020 agütsü.

Iba award nung citation ka, sarai ka, angabastra ka, gold memento ka aser senpet sen lakh 5 indang cheque ka densema lir.

Video ka ajanga, Bhaba Prasad Chaliha-i iba award takok anguba atema Assam nübur aser state Sorkar dang pelaba metetdaktsü.

Sentong tenzüka Assam chief secretary Jishnu Baruah-i telok pela agizük..

Maneni, iba sentong nung Assam education minister Himanta Biswa Sarma aser cultural affairs minister Naba Kumar Doley naprongla aruagi denogo.

DEBTS RECOVERY TRIBUNAL, GUWAHATI
Suwarna Bhawan, House No.12, New Town Path, Near Hanuman Mandir,
G.S. Road, Ulubari, Guwahati-781007 (Assam)
Case No.: OA/13/2020
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal
(Procedure) Rules, 1993.
Exh. No.: 752
STATE BANK OF INDIA
-VS.-
S. K. AUTOKRAFTS PRIVATE LIMITED

To,
(1) SRI HOKHETO KABOVI AYEMI
SON OF HOKHETO AYEMI, DIRECTOR OF S K AUTIKRAFTS PRIVATE LIMITED,
HOUSE NO.47 L HOTOVI, VILLAGE- NEAR GOVT PRIMARY SCHOOL,
DIMAPUR, SADAR DIMAPUR, NAGALAND, DIMAPUR, NAGALAND - 797112.
(2) SMTI RUTH SNOCK DAUGHTER OF LATE ASSANG SNOCK, PURANA
BAZAR, DIMAPUR, NAGALAND, DIMAPUR, NAGALAND - 797112.

SUMMONS
03.02.2020 nü akhümtsübua aliba Presiding Officer tsüngdang OA/
13/2020 benok. Tribunal-i iba Application atema summons/ notice
Act, (OA) nung section 19(4) kübok Rs.5,28,23,937.03/- sentsüh
agütsütsü atema na anema ken o benokogo. (application den
documents enoksema lir).
Act nung section 19 nung sub-section (4) den liromedema,
defendants nem yamai tetuyuba agütsür:-
(i) service of summons agütsüba sülen anogo semer tsüngda
nenok nem kechiba teyari magütsütsü;
(ii) original application nung serial number 3A kübok applicant-i
shia aliba rongsen aser kimunglumung metetdaktsütsü;
(iii) original application nung serial number 3A kübok agüja aliba
rongsen aser kimunglumung meyokdoktsütsü metetdaktsür,
ken o mangadang tashi iba ya meinyaktsü.
(iv) Tribunal nungi temelaba magiii original application nung
serial number 3A kübok agüja aliba rongsen aser
kimunglumung mayoktsü, tangar nem magütsütsü;
(v) rongsen aser kimunglumung yokdokra, iba nungi anguba
senotsüji bank mesüra financial institutions nung lapoka
aliba account nung enoktsü.
Tezüluba ka zülutsü aser 28.01.2021 anepdang 10:30 A.M nung
Registrar dangi arutsü tetuyuba agütsür, ibaji meinyakra na meliaka
application ji benoka angadangtsü aser telemtetba agitsü.
Given under my hand and the seal of this Tribunal on this date:
21.12.2020.

Registrar,
Debts Recovery Tribunal, Guwahati.

Hojai nung tetsür kaketshir 634 nem scooty agütsü

Hojai, January 4 (Agencies): Deobarnü Hojai District nung Assam minister of state (MoS) for health Pijush Hazarika-i tetsür kaketshir 634 nem scooty lema agütsü.

Assam Higher Secondary Education Council (AHSEC) ajanga tesüsa agiba higher secondary examination 2020 nung first division jenjang ajangzükteter tetsür kaketshirtemi scooty ya agizük. Kachari Maidan, Sankardevnagar nung Dr Banikanta Kakati Merit Award sentong agiba mapang kaketshirtem nem scooty ya agütsü.

Iba sentong nung minister Hazarika dak alia, Hojai MLA Shiladitya Dev, Lumding MLA

Shibu Mishra aser Hojai additional deputy commissioner Gauri Shankar Das nunger den tanga tongtibang nisungtem dena liasü.

Osangbener den jembiba mapang, minister Hazarika-i, "State Sorkari nangzükbba ama mapa küma inyakogo. Tesüiba anogo ana tejakdang, State telungtet nung temaba jenjang nung takok angur tetsür kaketshir 22,000 tashi nem scooty lema agütsüogo," ta ashi.

Iba maparen takok anguba atema pai Assam chief minister Sarbananda Sonowal nem tenüngsang agütsü aser "Chief minister Sarbananda Sonowal lenisüba kübok State renloka odar," ta ashi.

Form No.3
[See Regulation - 15 (1)(a)]
DEBTS RECOVERY TRIBUNAL GUWAHATI
Suwarna Bhawan, House No. 12, New Hanuman Mandir, G.S. Road, Ulubari,
Guwahati - 781007 (Assam)
Case No: OA/548/2018
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 781
UCO BANK
VS
MESSERS SHOE CHAMBER

To,
(1) MESSERS SHOE CHAMBER
D/W/S/O- Abdul Basit Choudhury
OPP CHRISTIAN HIGHER SECONDARY SCHOOL NEW MARKET
Dimapur, NAGALAND - 797112

(2) MR FAKRUL ISLAM
SON OF ABDUL MANNAN PROPRIETOR- NEW LADIES CENTER SHOP NO 221 WARD
NO 19(9)
NEW MARKET, DIMAPUR, NAGALAND - 797112

SUMMONS
WHEREAS, OA/548/2018 was listed before Hon'ble Presiding Officer on 05/02/ 2019.
WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 1293613.34/- (application along with copies of documents etc annexed).
In accordance with sub-section (4) of section 19 of the Act, you, the defendants are directed as under:-
(i) to show cause within thirty days of the service of summons as to why relief prayed for should not be granted;
(ii) to disclose particulars of properties or assets other than properties and assets specified by he applicant under serial number 3A of the original application.
(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;
(v) you shall be liable to account for the sale proceeds realised by the sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets;
You are also directed to file the written statement with a copy thereof furnished to the applicant and to appear before Registrar on 29/01/2021 at 10:30 A.M. failing which the application shall be heard and decided in your absence.
Given under my hand and the seal of this Tribunal on this date: 24/12/2020.
Signature of the Officer Authorised to issue summons.
Note: Strike out whichever is not applicable.

Registrar
Debts Recovery Tribunal
GUWAHATI

Form No.3
[See Regulation - 15 (1)(a)]
DEBTS RECOVERY TRIBUNAL GUWAHATI
Suwarna Bhawan, House No. 12, New Hanuman Mandir, G.S. Road, Ulubari,
Guwahati - 781007 (Assam)
Case No: OA/550/2018
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 782
UCO BANK
VS
MESSERS SNEHA CYCLE

To,
(1) MESSERS SNEHA CYCLE
D/W/S/O- Ms K Sultana
SHOP NO 48/1 A H ROAD,
Dimapur, NAGALAND - 797112
(2) MR ATAUR RAHMAN TAPADAR
SON OF KARAMAT ALI TAPADAR HOUSE NO 47 RAJBARI N L ROAD
DIMAPUR, NAGALAND - 797112

SUMMONS
WHEREAS, OA/550/2018 was listed before Hon'ble Presiding Officer on 05/02/ 2019.
WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 1125490/- (application along with copies of documents etc annexed).
In accordance with sub-section (4) of section 19 of the Act, you, the defendants are directed as under:-
(i) to show cause within thirty days of the service of summons as to why relief prayed for should not be granted;
(ii) to disclose particulars of properties or assets other than properties and assets specified by the applicant under serial number 3A of the original application.
(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;
(v) you shall be liable to account for the sale proceeds realised by the sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets;
You are also directed to file the written statement with a copy thereof furnished to the applicant and to appear before Registrar on 29/01/2021 at 10:30 A.M. failing which the application shall be heard and decided in your absence.
Given under my hand and the seal of this Tribunal on this date: 24/12/2020.
Signature of the Officer Authorised to issue summons.
Note: Strike out whichever is not applicable.

Registrar
Debts Recovery Tribunal
GUWAHATI

GOVERNMENT OF NAGALAND
DIRECTORATE OF INFORMATION & PUBLIC RELATIONS
IPR CITADEL, NEW CAPITAL COMPLEX
KOHIMA, NAGALAND

NO.DIPR/ADVT-1/2021

Dated, Kohima, the 4th January 2021

NOTICE

The official Nagaland Calendar 2021 and Nagaland Diary 2021, published by the Department of Information & Public Relations, Nagaland, are available for sale at the Directorate of IPR, New Capital Complex, Kohima from 4th January 2021 onwards. Interested persons may avail them during Office working hours at the Government approved rates:

1) Calendar - Rs. 150 /-
2) Diary - Rs 200 /-

Sd/-
Director
Information & Public Relations
Nagaland : Kohima



TIR YIMYIM YIMOBILEM (EDITORIAL)

DIMAPUR SANGTENNÜ, AENJETI (JANUARY) 05, 2021

LANURTEMI MAPA INYAK TENZÜKER

Asenoki asen lima nung lanurtem zünger mapa manguba indang kanga jembir saka ano külen reprangdangra, lanurtem rongnungsa zünger peisasa pei teka agi inyaka tsüraburtem anepalutetba lanurtem aika lir. Itemjiang shinga lar-a masü aser kilir-a masü, parnokjibo parnok taküm aser mapa nung parnok kibur. Item lanurtem aikati pei yim bushia oagi aonsutsü aser süngjanglu ayim tenzükogo aser ano aikati shiruru ak, an, nabong aser nashi metsü tenzükogo. Ano, karibo molok motok aser ki oset tapu balala yanglua ayoker. Town-tem nunga lanurtem aikati jangotsü, süoshi aser chiyongtsü ayokba dokan-tem lapoka shishilembaba mapa nung temulung agütsüba angur. Ano, talisa Dimapur ama town tulu, nütsüng aika alidakbo Naga nunger lanurtem aikati lanurtemi chinüba chiyongtsü tapu balala nikongdang nungi aonung nisungtem pei pei kidangi mousep tashi yimdong nung garitsüng aketba ki tilala yanglur, aji nunger arua amendaka yur, yang nung jagi soruchioka anganüa agütsür. Yimdong nung süaka, ajaki ngua merükmerüka techinütsüka awazür asünungji, süisüponger aikati meshia achir aser ano nisung aika nikongdang mulungsadoka yimdong nung medemertem den chiyongtsü lemsatepa achitsü arur. Ano, lanurtemi kanga tajangzük lia inyakba mapatem rongnung ki tasen nung light wiring otsüba, rong teptsüba aser tzü pipe nung mesüoktsüba mapatem lir. Item mapatem inyaker lanurtem nübo angutsüji kanga saaka kümogo. Parnokji kanga mazüng, kechiyong asen lima nung ya mapa maka masü saka mapabo inyaker meinyakma lir saka teinyaker agi anünger. Parnok asoshi lokti sentep aser sarusachi kangabo menügdaker aser mapa inyaksü ajar onsara nungji benjongbentsü amongtsüa mapang magütsütetter. Item takümüji jangratemtsüka. Parnok tangar dangi mapa meshii maor, kechiyong mapai parnok bushia arur, parnoki tangar dang nungi mapur saka aputsür. Parnok tenla agi arogo aser lokti nüngdak perir. Parnokji onsara mazüng nungji nüngsen aser olululu jembitsü mapang kenyongi mangur. Ano, tesem tesem nung lanurtemi ku mejepba aser tsüngsem meyushitsüba kitema lapoka aoba angur. Itemji ngurbo ku temejepnüsüka aser tsüngsema temeyushidaksünüsüka, anungji ku mejep memeshiyonga odang mejeper aser tsüngsem merüka liaka, odang meyushidaksür aser parnoki item mapatemji kanga junga inyaker. Kopi melii item nisungtemji dokan tuluba kümer parnok ki aser parnok mapa agi asen lima aser yimti topur jungdakja inyakba asenoki angutsü. Tanü yimdong nung süngo yoka jajala aser jajasangji küm ishika lirbo, yimti nung parnok hotel-sa tajungba aser tuluba ta asenoki angutsü. Tanü tetsüng agi mapai aoertem aser pei teka agi mapa temerang inyakeritemji asüng gari tajungtiba nung mener ki tajungtiba nung lia asenoki angutsü. Item jenjang ajakji kenü aonsutsü lu tilaka yima tenzükba, kenü ak an metsü tenzükba aser kenü tani tebelem arema teka mapa inyak tenzükba nungi ajangzüksü. Ano, tanü asüngbo asenoki yanglutetba osettem online nung sayutepa ayoker lanurtem aika lir. Taküm ya sayatenya agi sünga lir, kechiyong asenoki kecha maka yimdong nung chiyongtsü tilala yoka anguba nisungto küm ishika nung takar kümer angur aser kecha meinyak ser takar akümsangto kecha maka küma aoba angur. Asenokia koba shimtetsü ? Asenokbo mapa meinyak ser ita sen chia alitsüba taküm nükshia dang kecha meinyak alitsü asü ? Atangji asenoki Tsüngrem sayatenya dak amangtsüla saka sayatenya tenzüksü atema tamasa asen teka agi inyak tenzüksüla. Asenok mashimashika zünger mapa mangu kazütepba nungji Tsüngremi sayatenya meinyaktetsü aser nisungia meyaritetsü. Aji oda, tazünga junga mezüngtet aser mapa mejimenua meinyakner ta kazüa senzürtem dak Tsüngrem sayatenya inyakba mangutsü. Tsüngrem sayatenya mapa inyaksü asoshi asen ket nung amtsük pongo aser ango anatobosa akatsüla, temerem tzüim tobo asen tsüng agi ajangtsüla aser ayong nungtobo asensasa aseni pongoktsüla. Tanü lanurtem aikati ibaji angateta lir. Item lanurtem jagi lisem lima agi ali temo aketba lima kümdaktsüba ama, mapa maka ama küma oa aliba asen lima agi mapa inyaker meinyakma adokdaksüba lima kümdaktsütsü aser mapa meinyak ser takar akümtsü toktepba lima agi, mapa inyaker nümadangdanga takar akümba lima kümdaktsütsü.

OLEMSABANG

YISU NÜTSÜNGTEM POLITICS ASER NAGA NUNGER POLITICS

~ Wati Longchar, Serampore

Meimchir rongnung liromedem adokdaksütsü asoshi bangdak latet ka alir aser yimden tarensen balala aika angutsü. Alima kar nung loktii mulungba yimden, alima kar nungbo military aser dictator yimsüsüba kübok, kar nung chuba yimsüsüba ta angutsü. India nüjiso ngur külen nungi nübur teimbai mulungba yimden yayim benoka amshia arur. Saka tanü India nung BJP-i Hindu tesayuba nung amendaker telok terenlok, India tejaklen ta ayimokja saka kibok nungbo Hindu Rashtra yangerba angur. Telok tila (minority) pur asoshi tebilemtsü tulu lir.

TEMABA JENJANG ASOSHI POLITICS ASAYABA

Election mapang, Nagaland nung, agent-temi candidate dang na adokra, nai iba post-ji kü nem agütsütsü ta nangzükttetra, azüa tenlaa yaritsü, ni vote paiga tashijibo bener arutsütsü ta azüngashi o jembiba ama Yisu nütsüng ana - Zebedee chir Yakob o Yohan nati Yisu dang kodang na chuba menden nung mendir, ka tachichi aser ka tabenlen ta amentsü maongka agüjang ta miima ashiba angur. Kodang tanungba nütsüng teri aji metet, parnok kanga jashi, temulung melemtep adok kechiaser parnoka kasa taginüba liasü. Parnok rongnung temaba jenjang arishitepba, tenükmerenba, ni tuluba asütsü ta toktepba ngua, Yisui parnok jar ashi, "Saka nenok rongnungbo yamaji malitsü; saka nenok rongnung shibai tulu kümnür, pa nenok tenzük asütsü, aser nenok rongnung shibai mezüngbuba kümnür, pa ajak lar asütsü. Kechiyong atangji Nisung Chir-a sünga pei tenzükdaksütsü atema masü, saka tenzüksü aser aika alang pei taküm agütsütsü aru." (Mk. 10:43-45). Tetezü, tila akümba aser ajemalu akatsüba indang ashir. Shibai tilatiba kümer nübur ochi nung ajemalua tenzüksü ta tangatetba aser tanela makara, alimai aginüba ama yimsüsür ka mekümtet.

Yisu Khrista putu, Palestine lima Rom nunger yimden yimsüsüba kübok azüoka liasü. Tashiyim amshia yimsü asübaji hau ta amangdaksütsü atema, tamangba yimsü bener ait. Iba mapang tesayuba kaji Rom chuba ya Tsüngrem mesükba nung yanglu (chuba dangashi nüburtem Tsüngrem mesükba nung meyanglu ta sayu) aser Tsüngremi meimchir kümzüksü Rom chuba alimai yok aser pa yimsüsüba kübok alima ajonga anir aittsü aser teti asoshi alitsü, anungji ajaki Chuba madang aputaka külemtsüla ta ozüng agütsü. Chubaji tenük agi anguba Tsüngrem asü nung pai jembizüka yokbaji Tsüngrem O aser chuba anema jembibaji Tsüngrem anema jembir ta angatet. Tetezü, chubai ashi angabaji Tsüngremi ashi angaba den saku, saka chuba ozüng mangartemji Tsüngrem anemer amai anungji parnokji kangki nung meta. Tejen Lai putu chuba aser Tsüngrem anema jembirtemji lung agi onsenta südaktsü, tat.agi, Naboti chuba aser Tsüngrem anema jembioigo ta aija lung agi tepsetba angur. Tasen Lai mapa nungbo, lung agi dang masü, kangki nung meta. Yisu Khrista Tsüngrem anema aser chuba anema jembir ta aija kangki nung meta. Yamaji nütsüngtem aika kangki nung meta. Ibaji nüburtem dang chuba külemtsüla, manemtsüla ta tsübudaktsütsü tasa liasü.

Ano Rom chuba kübok tashi anga ali nung dang yimchiyimjung alima nung alitsü ta sayu. Anungji lenmang aser lenjem balala, lokti sentepba jaka balala ajak nung Chuba süngyanglukar ajongli, karbo hon agi menoka yanglu. Nüburtem süisüpondang apudaka külemdaksü. Yamaji Chubaji tsüngrem kümdaktsü. Tanüa sen jenti lalua, nüburtemi külemdaksütsü aser akhümtsübu agütsüdaksütsü asoshi yimden yimsüsür noksa lemjen balala nung yangluba angur.

Yisu nütsüngtemi Rom yimli ama, Yihuda yimlia Yisui yangertsü ta angateta, parnok rongnung temaba menden asoshi raktepa politics asayatep. Tashi amshia, ni tuluba, ni temaba asütsü ta, ni ashiba dang angatsüla, kü madangi arua apudak nung dang ni yaritsü ta bilemba agi sünga liasü. Yisü nütsüngi angatetba ama yimden yimli, yimsüsüba menden raktepba ajanga teraksa adoker. Tanü Naga nunger yimden asüngteta timi bener moutetba teraji tashi toktepba, sen arishiba, tenük merem, mang yangtepba aser asüküm ya lir ta shitettsü.

Tamangba yimsü teküzmüker amai tanü alima aika nung yimden leniri sayuba angutsü. Talisa fascist (pei ajungtsü dang bilemba lenir) yimsüsür Donald Trump, Rodrigo Duterte aiben tamang yimsü teküzmüker amai inyakba angutsü. Donald Trump tanaben meshimra, Muslim yimsü alima ajak amokpangtsü. Muslim yimsü nungi kümzüksü Tsüngremi pa yok ta teyazü sayutsünger aikati shinba nguogo. India nunga Prime Minister Narendra Modi aser pa kübok MP (aser MLA) aser Ministertem-i nashi ya temeshi shiruru aser aji külemba angur, Khristantem temesüng limai oadoktsüla, Muslim nunger Pakistani aotsüla. Hindu yimsü dang shitak anungji India nunger ajaki Hindu yimsü dang amangtsüla ta jembiba ajangshia arur. Ibala mesükba dangji yimden tashi ngutettsü asoshi tamangba yimsü amshiba ta ashitsü akok.

Naga nunger nüjiso bushir telokia "Nagaland for Christ" ta sür nisung tepsetba, auüyaba aser rakzükraktemba angur. Iba dang ya mockery of Christian teaching ta ashitsü akok. Deobarnü dokan shibangtsüla, Christmas aser New Year mapangbo dokan lapoktsüla ta ozüng agütsüba. Item amala ozüng agütsüba ajanga nüjiso bushir telok yimdenia tamang maparen asoshi aria bilemdar aser noktaker ta tema nung sayutsü atema inyaker aser yamaji inyakba ajanga tamangba yimsüa temeten ngudaktsünüba aser nüburtem nem akhüm tsübudaktsütsü atema inyaker ta metettsüla. Item amala lenir jagi alima tejakleni kodanga manitsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Texas nung aliba Methodist Arogo nung pastor ka khaset



Texas nung aliba Starrville Methodist Arogo Tenla ki noksa nung angur. Telung noksa nung pastor Mark Allen McWilliams noksa angur.

Winona (Texas) January 04 (Agencies):

Amongnü (January 3, 2021) Texas nung aliba Methodist Arogo ka nung pastor ka khasetba aser nisung ana yirutsüba sülen arrshi küm 21 tebur ka puogo, ta county sheriff-i metetdaksü.

Honibar nikongdang ketdangsertemi azü aser drones amshia nisungbaji bushia liasü; iba mapang nungji Starrville Methodist Arogo nung pastor-i nisungbaji Arogo Tenla ki bathroom nung atsüka lia angu, ta Smith County Sheriff, Larry Smith-i metetdaksü.

Osangbenertem senden nung jembidang Smith-i, nisung kati gari nung mener prangpong ka amshia sayuba agi police-i paji arishia liasü; nisungbaji arrshi küm 21, Mytrez Deunte

Woolen lir ta jangjaigo; Amongnü anepdang yakta 2:00 ako nung police-i iba tesemji toktsüba sülen pai Tenla kiji kakpoka liasü, ta metetdaksü.

Iba Arogo nungji pastor, Mark Allen McWilliams-i prangpong ka amer Woolen nokdangtsü merangba mapang nung Woolen-i prangpongji rakzüik aser pastor dak injang khaloktsü. Injang agi yirua pastor asü, nisung ka injang agi yiru aser ka alanga yiru.

Iba sülen Woolen-i pastor indang gari auyar ajen saka police-i Harrison County nung pa puogo, ta Smith-i metetdaksü.

Amongnü anepdang 9:20 ako meta pastor khaset, iba mapang nungji pastor den pa kinüngtsü aser nisung ana Tenla

kidangji liasü, ta Sgt. Larry Christian-i metetdaksü.

Police dang nungi ajenba sülen Woolen Tena kidang jenoka liasü, aser pai pastor khasetbaji tamangba yimsü tsütsü sendaktepa mali, ta sheriff-isa metetdaksü.

Pastor khasetba osang angashia Governor, Greg Abbott-i mangyim lemsatepogo. "Tanü iba lendong nung asür aser yirua alir kibongtem den onoki mangyim jashi lemsateper," ta Governor-i sangdong ka ajanga metetdaksü.

Starrville Methodist Arogo Tenla ki ya 1853 küm yanglua liasü. Küm ka tejaklen nisung katia iba Tenla kidangji nisung ana khaseta liasü.

Khristmas mapang nung Islamic kiralongrartemi Khristan 5 khaset



January 04, 2021: Khristmas mapang nung Islamisc kiralongrartemi Nigeria nung Khristan pongu khasetogo, ta Release International osang ajanga metetdaksü.

Boko Haram nungi razüka aoba kiralongrar telok- Islamic State West Africa Province (ISWAP)-i Khristantem khasetba atema tenüng agiogo.

ISWAP kiralongrartemi video ka ajanga, parnok tepsetba ya alima tesem balala nung Khristantem aser Nigeria nung Khristantem amokmerenba temaitsü lir, ta metetdaksü.

Nigeria kübok Adamawa State nung aliba Garkida jila nung Khristmas anogo nung kiralongrartemi nisung 11 pua liasü, aser tang Khristan pongu

tepsetbaji parnok rongnungi asütsüa akok ta bilemer.

Kiralongrartemi parnok khasetba video ji tangok; Khristantemji teka tesülen nungi alenba sülen ali nung temokok agi nendaka mendaktsür khaset.

Parnok khasettsü jakdang parnok dang peipei tenüng shidaktsür. Par ponguji Uka Joseph, Sunday, Wilson, Joshua Maidugu aser Garba Yusuf nunger liasü, aser parnoki parnok tenüng dang masü saka 'Ni Khristan' ta ashir.

2019 küm nunga Nigeria linük nung Khristmas anogo nung Khristan aid workers 11 kasa yimya nung khaseta liasü.

December ita nung kiralongrartemi Garkida jila amakba mapang nung Tenla

kitem, hospitals aser ki aika rongdokja liasü.

Release International CEO, Paul Robinson-i, "Khristantem mejungi tepsetba rongnung iba ya ka lir; Khristan asübayong tepseter; iba ya ajanga Release International-i Nigeria atema aria bilemja inyakba ano tashi taitba akümtsü," ta metetdaksü.

"Boko Haram aser ISWAP napronglai Khristantem tepsettsü tenangzükba agiogo. Iba dak alia Fulani telungpurtemi north tsütsü aliba yimtsüngtem nung Khristantem aridoker; iba ya mesangdongi inyakba 'jihad' rara lir. Nisung jenti tepsettsü, ta Release International-i tekümdangtsü sangdonger," ta paisa metetdaksü.

ANOGO ABEN TSÜNGREM DEN

Yisu Bushiba MK. 1:36

Asenok ajaki Simon Peter junga meteta lir kechiaser tamachi aser osangtajung ajunga nung pai jepdak jembi (Matt 16:22; 17:4;26:33). Saka Peteri teti Yisu bushia liasü. Peteri Yisu kangki nung angenlokba aonung Yisu sullen talang nungi anidak (Matt. 26:58). Peteri kodang Yisu shia aruba anagashi leperi asem (Luke 24:12). Yisu tonga aotsü asoshi Peteri tzüyim nung jaja (Yn 21:7) aser Yisu den atentsü asoshi tzüma nung jaja (Matt 14: 29). Peter teti shidak mejembi mesüra shidak meinyak, saka pai teti Yisu den alitsü bushi. Ibayongji, pai teti pa Kibur den ajurutep aser mulung lemtet nütsüng küma ain.

Kodang Peter Yisu dangi aru tangaria pa anidak. Peteri kechi bushia liasü tangaria aji bushi. Nai kechi metet ibaji ajanga tangari na tajungtiba metet asü? Nai Yisu bushir ta tangari na metet asü? Tsüngrem tenangzükba: "Aser nenoki ni bushitsü aser ni angutsü, kodang nenoki temulung ajak agi bushidir" (Yn 29: 13).

Ni tatishitsü anidakba agi tangar Yisu anasa indaktsür asü? Ne mulungjang Yisu bushitsü merangra, nai teti Pa angutsü. "Aser Tanela aser tanioklai, Arung, ta ashir. Aser shibai angashir Pai arung ta shiang".

Nigeria nung putir ka apuba sülen anogo pongu lir chiokogo

January 04 (Agencies): 1996 küm Nigeria nung Nigeria nung mejangjaba nisungtemi Catholic putir ka pua liasü saka anogo pongu lir chiokogo, ta Oweri nung Archdiocese-i metetdaksü.

January 1, 2020 nü southeastern Nigeria nung aliba Arogoi social media post ka ajanga, putir Moses Chikwe aser pa indang driver, Ndubuisi Robert na meyirutsüi chiokogo aser tena chioktsü atema sen-a makhang, ta metetdaksü.

"Ano osang tejangja maneni angashitsü. Tsüngrem sentsüwangshidaktsür. Tsüngremi Par nüburtemi sarasademba ola angashiogo," ta Arogoi metetdaksü.

Owerri archdiocese nung putir, Chikwe ya December 27, 2020 aonung Imo State yimtiba, Owerri nung mejangjaba nisungtemi puer oa liasü.

Iba sülen Nigeria nung putirtemi arrshi küm 53, Chikwe dak tamajung kecha mataloktsü aser tekara nung chioktsü atema sarasademjang, ta mepishia liasü.

California nunga Khristantemi sarasadem sentong ka ayongzüka putir asoshi sarasademja liasü.

Chikwe ya mapang talangka Diocese of San Diego nung putir inyakba sülen par linüki (Nigeria) meyipa arua liasü.

Chikwe ya putir ka ama ordain asüba sülen Loyola Marymount University, Los Angeles nung educational administration master degree agi aser UCLA nung PhD renema liasü.

Chikwe-i San Diego nung aliba St. Joseph Cathedral nung küm trok putir inyak aser La Jolla nung aliba V.A. Hospital nunga chaplain inyaka liasü.

December 29 nü Owerri nung Archbishop Anthony Obinna-i sangdong ka ajanga Khristanatem dang putir atema sarasademjang, ta mepishia liasü.

Putir Chikwe aser pa indang driver naprongla puer aoba sülen garijibo meyipa bener arua toktsü saka putir den driver bo mejangjaba tesem kati anir oa liasü.

December 15, 2020 nüa Imo State nung Sons of Mary Mother of Mercy (SMMM) nung züngsem aser putir, Valentine Oluchukwu Ezeagua tebu asüpila sentong nung adenba sülen meyipa aruba mapang nung mejangjaba nisungtemi puer ao, ajisüaka tasüngnüsa chioka liasü.

November ita nunga Archdiocese of Abuja nung putir, Matthew Dajo apuba sülen anogo ter lir sülen chioka liasü.

OLONG PAITEP # 5684

1			2			3		4		
					5					
		6								
							7			
		8								
9										10
				11		12				
13										
14						15				

TIPIEN

1. Chiyungtsü oksa
3. Tatalokbatem
5. Tama
6. Pei meyong aküm
7. _ _ _ bang
8. Kinungpurtem
9. Nokdak masü
12. _ _ _ la
13. Ochi masü
14. Yagi Sü ataker
15. Temadok

LANGTSÜNGLEN

1. An tetsü
2. Juzüa senzüba shiruru
3. Tamendakdak
4. Tiak-asang
7. Tasa
8. Süngjang telung nung aliba
10. Ibai masü
11. Ano mamen

OLONG PAITEP # 5683 TELANGZÜBA

TIPIEN :

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong, 6. Lungkak,
7. Milak, 9. Zünga, 10. Temopu,
12. Walu, 14. Ali.



2020 DECEMBER ITA LILI RESULT !

December ita nung Lili tajungtuba (First) shimteta tanü yangi lephsia agütsür. Lili zülur-i January 10, 2021 tashi nung Tir Yimyim Office nungi senpet agizütsü mepishia metetdaksür.

TESAYUR-I ALOKBA DANG ASÜNGDANGER :



- Tesayur** : Alok, naia koba ita nung lesson bushitsü tejangraba?
- Alokba** : Octembruari ita.
- Tesayur** : Sowar, küm ka nung iba itajibo mali!!!
- Alokba** : Shitaka
- Tesayur** : Süra, ano ka asüngdangdi. Na bate of birth shiang?
- Alokba** : December 25
- Tesayur** : Koma küm aso??
- Alokba** : Sir, ni tasoba anogo ya küm shia arur.
- Tesayur** : Oh!!! ALOK!!!!

Lilir : WhatsApp

TANÜBO NAI LANGZÜANG

- Q. Outer Space Treaty ya _____ küm United Nations ajanga agizük.
- A.1962 B.1963
- C.1964 D.1965

===== (Taruba adok nung onoki langzünsü)

YASHI ADOK TELANGZÜBA : Bhopal

Happy Birthday



TENÜNG

: B. MOLUNGZEN IMSONG

Tasoba anogo

: 5 January

Küm

: 3

Talidak

: Duncan Dimapur

Ozü jabaso Molungnen arishi küm 3 tashi pa taochi nung yutsüba asoshi Tsüngrem tenüng asanger. Ano maneni anema aliba den arishi talang moajangma ta özü sarasadem.

- Temeim oja, oba, otsü, obo, tanubo yang, oko meren, onü, aser kinüngerterem

NAI-A YA METETTER MA?

JANUARY 5 NÜ ASOR TONGTIBANG NISUNG KAR:

- Colorado nung Pike's Peak ngutetsang Zebulon Pike (1779)
- U.S. baseball executive & Baseball Hall of Fame member - Ban Johnson (1864)
- Walter Mondale, former U.S. vice president (1928)
- Italian writer Umberto Eco (1932)
- U.S. football Hall of Fame member Chuck Noll (1932)
- Football Hall of Fame member Jim Otto (1938)
- Filmmaker Hayao Miyazaki (1941)
- Talk show host Charlie Rose (1942)
- Actor George Reeves (1914)
- Actor Jane Wyman (1917)
- Actor Robert Duvall (1931)
- Actor Diane Keaton (1946)
- Actor Pamela Sue Martin (1953)
- Actor Clancy Brown (1959)
- Singer Iris DeMent (1961)
- Actor Suzy Amis (1962)
- Rock singer Marilyn Manson (1969)
- Actor Bradley Cooper (1975)
- Actor January Jones (1978)
- DJ Deadmau5 {Joel Thomas Zimmerman} (1981)
- Actor Jason Mitchell (1987)



Bradley Cooper

SUDOKU # 5725

	8	3			2				3	9	5	4	2	6	7	8	1
		9	4			6			8	4	7	9	1	5	3	6	2
5			9			3			2	1	6	3	7	8	5	9	4
1			8				3	2	5	2	3	1	4	9	6	7	8
6		2		3	4				7	6	1	2	8	3	4	5	9
4			5	2			6	7	9	8	4	5	6	7	2	1	3
3	7	1	2						1	5	8	7	3	4	9	2	6
9	2					7		4	4	7	2	6	9	1	8	3	5
8			1	6					6	3	9	8	5	2	1	4	7

TELANGZUBA # 5724

OJANG LUTEP # 5272

- IMAALJI :
- KKAOMA :
- MSHELENIA :
- LOKRENA :
- ONGAOYA :
- IPE :
- BALISOBA :
- ETMETA :
- ITSALÜ :
- METSÜTETLA :

OJANG LUTEP TELANGZÜBA # 5271

TAREMZÜK ASER YIMLIBILEM METETBA DANG MASÜ

SAKA MAPA AJANGA SAYÜTSÜLA



January 04, 2021 nikongdang New Delhi nung sorkar aser aluyimertem senden amentsü lia parnoki longkak aitba mapang asür aluyimertem nem akhüm agütsüba noksa nung angur. Noksa nung Union Minister for Agriculture & Farmers Welfare Narendra Singh Tomar, Railway Minister Piyush Goyal aser Minister of State Som Prakash nunger angur.

Covid vaccine program tulutiba India nung tenzüksü: PM Modi

New Delhi, January 04 (Agencies): Hombarnü Ato kilonser, Narendra Modi-i, coronavirus tashidak anema vaccine program tulutibaji India nung tenzüksü, ta metetdaksü.

'Made in India' vaccines atema scientist tem aser technicians nem tenüsang agüja Modi-i, parnok ajanga India-i nüma atanger, ta ashi.

"Alima nung Covid-19 vaccination programme tulutibaji India nung tenzüksü;

scientist tem aser technicians ajanga linüki nüma atanger," ta metetdaksü.

National Metrology Conclave nung scientist tem den jembidang Modi-i, 'Made in India' products ji alima nung nüngdakba dang masü saka alimai agizüktetba asütsüla, ta ashi.

"Aika dang nungibo quality ji tongtibangba, Aatmanirbhar Bharat atema inyakdang asenok indang products ji

ajungtsüla," ta pai ashi.

Amongnü Drugs Controller General of India (DCGI)-i linük nung Serum Institute of India (SII)-i yangluba Oxford Covid-19 vaccine- Covishield aser Bharat Biotech-i yangluba Covaxin vaccine amshitsü atema emergency use authorization (EUA) agütsüogo.

Joko kobi meli taruba anogo ishika tsüngda coronavirus anema vaccine anaji amshi tenzüksü.

Coronavirus vaccine ji PM Modi nem tama agütsütsüla: Ajit Sharma

Patna, January 04 (Agencies): Russia Tir, Vladimir Putin aser US Tir shima alisang, Joe Biden nati nüburttem nem tamang kadaksütsü atema tenati mezüng coronavirus vaccine agia liasü, yamaji linük nung Ato kilonser, Narendra Modi-ia mezüng iba vaccine agütsütsüla, ta Bihar Congress lenir, Ajit Sharma-i ashi.

Modi-i tama coronavirus vaccine atuba ajanga linük nüburttemi temelung lemtetsü; Modi-i Putin aser Biden nati inyakba ama inyaktsüla, ta Sharma-i ashi.

Amongnü DCGI-i Bharat Biotech indang 'Covaxin' amshitsü atema temelaba agütsüba sülen Congress lenir aikati, Covaxin tendangba shilem 3buba ano metembang sür nung kechiba temelaba agütsü, ta ashishidar.

Congress lenir aser MLA, Ajeet Sharma-isa, Ato kilonser, Modi dak alia BJP tongti lenirtemia iba vaccine agia sayutsüla, ta ashi.

"Küm tasen nung vaccine ana anguba atema onok pelar, ajisüaka nüburttemi iba vaccines atema ratamadar. Ratamata malitsü atema Russia aser America nung tongti lenir anati vaccine tama agia sayuba ajanga nüburttem tamang koktetogo, anungji nüburttem melung koktettsü atema Ato kilonser Narendra Modi aser BJP nung lenir taintemi tama iba vaccine agia sayutsüla," ta Congress party leniri metetdaksü.

Ajeet Sharma-isa, Serum Institute aser Bharat Biotech nati vaccine yanglutetba atema BJP-i tenüng tajung agitsü meranger, ta aitsü.

Vaccine yanglutetba Serum Institute of India aser Bharat

Biotech na ya Congress yimsüsüba mapang nung tenteta liasü, ta BJP-i mamadoktsüla, ta paisa ashi.

"Vaccine amshitsü temelaba agütsüba sülen BJP-i benjungteper, saka tenüng tajungji Congress-i agitsüla, kechiyong Congress Party-i yimsüsüba mapang nung company ana ya tenteta liasü," ta paisa metetdaksü.

Amongnü Congress lenir aser MP, Shashi Tharoor-ia, anojungi COVID-19 vaccine--Covaxin amshitsü atema temelaba agütsüogo; iba vaccine ya tang shilem 3buba nung ang tendangdar, anungji iba vaccine ajanga timtem agütsütsüla akok, ta jembia liasü.

Tharoor-isa Union Health Minister, Dr Harsh Vardhan dang vaccine tendangba metembang tashi temelaba magütsütsüla, ta mepishia liasü.



Mumbai, January 04, 2021: Temesepba mozü dak sendakba ken o nung actress, Rhea Chakraborty, Mumbai nung aliba Narcotics Control Bureau (NCB) office-i arudang tangokba noksa nung angur. Kasa noksa nung Rhea tebu, Indrajit Chakraborty-a angur.

Centre sorkari aluyimertemi akhangba ajak agizüksüla: Kejriwal

New Delhi, January 04 (Agencies): Delhi Chief Minister aser AAP convener, Arvind Kejriwal-i Centre sorkar dang aluyimertemi akhangba onük ajak agizüksü aser aluyimba ozüng asemprongla agientsü mepishi.

Hombarnü aluyimertem Unions balala nungi lenirtem aser sorkar tsüngda senden amenba anogo nung Kejriwal-i twitter ajanga aluyimertemi tzünglu aruaka aser kanga

temekong süaka maneni longkak aitba atema tenüsang agütsü.

"Tzünglu aruaka aser kanga temekong süaka aluyimertemi maneni longkak aittsü telemtetba agiba atema ni parnok nem tenüsang agütsür. Ni Centre sorkar dang tanü senden nung aluyimertemi akhangba onük ajak agizüksü aser aluyimba ozüng asemprong agientsü mepishir," ta Kejriwal-i Hindi oshi agi tweet asü.

Republic Day parade tatsüba agitsü

New Delhi, January 04 (Agencies): Coronavirus wara aliba nung ajemdaker takümbo Republic Day Parade mapang tatsüba agitsü aser march past nung shilem agir contingents nunga nisung ishiba asütsü; iba dak alia sobaliba sentong nung nisung tajembai shilem agitsü aser sentong nung adenertem-a tajemba asütsü, ta ketdangsertem osang ka ajanga metetdaksü.

January 26, 2021 nü Rajpath nung Republic Day sentong nung shilem agirtem aser adenertemi social distancing beshitsü.

Republic Day parade nung linük mitkar tashi sayur aser sobaliba sentongtem sayar, ajisüaka coronavirus wara aliba nung ajemdaker tekümdangtsü telatetbatem beshitsü, ta

sorkar ketdangsertemi metetdaksü.

1971 war of liberation sülen küm 50 ajungba nüngtem nung takümbo Bangladesh armed forces-ia parade nung shilem agitsü aser parade nung tongti tesemdangjerji United Kingdom Ato kilonser, Boris Johnson asütsü.

"Parade ji akhi ama Vijay Chowk nungi tenzüksü saka Red Fort nung masü National Stadium nung ang tembangtsü. Tamalen parade ji kilometer 8.2 agia liasü saka takümbo kilometer 3.3 dang agitsü. Küm shia tereprangertem lakh 1.3 jaoker saka takümbo 25,000 dang jaoktsü. Arrshi küm 15 den tajemba tanurtem aser co-morbidities keta alir taintem memelatsü," ta ketdangser kati metetdaksü.



Mumbai, January 04, 2021: Tamalen Malegaon nung bomb lendong agütsüba ken o dak sendakba nung Hombarnü BJP MP, Sadhvi Pragya Singh Thakur, Mumbai nung aliba NIA court-i arudang tangokba noksa nung angur.

India nung ano nisung 16,504 dak Covid-19 putet aser 214 asü

New Delhi, January 04 (Agencies): India nung ano nisung 16,504 dak coronavirus tashidak putetba sülen coronavirus case ajak agibo 1,03,40,469 jungogo aser iba tashidak agi shiranger lakh 99.46 anepogo, ta Hombarnü Union health ministry-i metetdaksü.

Tesüiba ghonda 24 tsüngda coronavirus tashidak agi ano nisung 214 süogo aser linük nung iba tashidak agi asür ajak agibo 1,49,649 jungogo.

Iba tashidak agi shiranger 99,46,867 anepogo (shilem

96.19) aser iba tashidak agi asür shilembo 1.45 dang lir. Tanü agi anogo 14buba linük nung coronavirus tashidak agi teshirangdakpur lakh 3 den tajemba lir, ta Health Ministry-i metetdaksü.

Tang linük nung iba tashidak agi teshirangdakpur 2,43,953 dang lir, aser ibaji coronavirus caseload nungi shilem 2.36 dang lir.

ICMR-i ashiba agi, January 3 nü samples 7,35,978 tendangogo aser tang tashi nung samples ajak agibo 17,56,35,761 tendangogo.

S Africa COVID ya UK nung aliba dang tamajungba: Hancock



London, Aenjeti/January 04

(Agencies): South Africa nung jangjatetba COVID-19 tabu tasenba ya UK nung aliba dang nungi kanga agi lendong tuluba keta lir, ta British Health Secretary Matt Hancock-i ashi.

"South Africa nung aliba virus tabu tasenba atema ni kanga shisabulur, aser iba yongji South Africa nungi aruba tayimtsü ajunga nokdangtsü atema asenoki mera agi," ta Hancock-i Hombarnü BBC Radio dang ashi.

"Ibai tebilemtsü kangasa tulu lir... aser ibai UK nung aliba virus tabu tasenba dang nungi kanga agi tamajungba lir."

Coronavirus tabu tasenba kanga kera prokshia aoba azüoktsü atema linük nung tesem kar nung tenokdangba akang-akanga agitsü nungdaker, ta pai ashi.

Deobarnü nisung tasen 55,000 jungnüa dak coronavirus putet aser linük nung COVID-19 tashidak wara pokteter nisung 75,000 dak tema süogo,

koba Europe nung tematiba jenjang tanabuba aser alima nung tamajungtuba jenjang trok buba alitsü.

Britain aser South Africa nung tawa coronavirus tabu tasenba ya jangjateta liasü.

COVID-19 mozü temi South Africa nung jangjatetba virus tasenba ya koktettsü ta scientist tem temolung lema mali, ta British sorkar indang scientific adviser kati ashi.

Scientist temi ashiba agi, South Africa nung poktetba tabu tasenba ya danga linüktem nung aliba dang nungi balaka, kechiaser nisung temang nung aliba cells nung atemtsü atema virus-i amshiba "spike" protein nung mutations ya aika lir.

Iba coronavirus tasenba agi shiranger temang nung virus particle tem timba alir, anungji menatepa aotsü temelaba kumdaktsür.

Tang yanglua aliba mozütem yagi British nung pokteta aliba coronavirus tabu tasenba nung mapa inyaktsü akok, saka South Africa nung aliba atema ashitsü makok, ta University of Oxford nung regius professor of medicine, John Bell-i deobarnü ashi, shiba sorkar indang vaccine task force nung züngsem lir.

South Korea nung diesel train tem melentsü

Seoul, Aenjeti/January 4

(Agencies): South Korea-i diesel passenger locomotives ajunga bullet train tasen agi melena 2029 tashi nungbo railway ajanga carbon adokdaksüba shilem 30 agi tejemba kümdaktsütsü sentong lir, ta tir Moon Jae-in-i Hombarnü ashi.

Moon-i electric multiple unit train KTX-Eum tendangba nung shilem agiogo. Alima nung fossil-fuel dak metaloker aliba linük rongnung South Korea-a ka lir aser tang parnoki mopung menentsüba tajemba kümdaktsütsü merangdar.

"Onoki diesel passenger

train ajak 2029 tashi nungbo KTX-Eum agi melentsü aser linük ajunga nung eco-friendly railway transport amenoktsü," ta Moon-i Wonju yimti kübok station ka nung o jembiba mapang ashi.

"Iba mapa inyakba ajanga greenhouse gas emissions tone 70,000 agi tajemba akümtsü, koba pine süngtong million 10 atemba den kasa asütsü aser carbon neutral society ka yangertsü atema jenjang ka asütsü," ta paisa ashi

Hyundai Rotem Co-i yangluba train yagi diesel train agi carbon adokdaksüba shilem 70 shi dang adokdaksütsü.

State meyong Korail Railroad Corp-i ashiba agi 2019 küm diesel train temi tone 235,000 adokdaksü.

Iba train top speed ji ghonda nung 260 km (162 miles) asütsü koba KTX (300 kmh) dang nungi tera agi meylongiba senzür.

Moon-i "Green New Deal" ka ajungketdar, koba küm trok nung tembanga inyaktsü sentong nung inyakdar aser iba ajanga mapa tali adokdaksütsü aser fossil fuels dak metaloker aliba tajemba kümdaktsütsü.

Moon-isa, South Korea ya 2050 tashi nungbo carbon neutral asütsü ta sangdongogo.



China northeast tsütsü Liaoning Province kübok Huanggu District, Shenyang nung January 4, 2021 nü epidemic prevention and control nung mapa inyakertem nokdaka aliba noksa nung angur. Shenyang nung tesem 16 tashi COVID-19 atema medium-risk zone ta jangjatetogo, ka yangji aliba health ketdangser kati Hombarnü ashi.

Pakistan nung yimden yimsüsürtemi Khan sorkar aitsü

Peshawar, Aenjeti/January 4

(Agencies): Balochistan kübok Mach tesem nung Deobarnü mejangjaba nisungtem nagmati atur 11 tepsetba sülen Pakistan nung political party balalai iba tatalokba aitsüogo aser Ato Kilonser Imran Khan-i aniba sorkar dang nakmati atuba tesem nung inyakertem kümzüka toktsütsü atema jenjang tapet agitsü shiogo.

Awami National Party (ANP) tir Asfandyar Wali Khan aser Qaumi Watan Party (QWP) mendenbuba Aftab Ahmad Khan Sherpao-i, Imran Khan-i aniba Pakistan Tehreek-e-Insaf (PTI) party aija, iba tatalokba ya agizüktsü makoktsü ta shiogo aser sorkar dang asür kinungertem nem teyari agütsütsü atema khangogo, ta Dawn sangdong ka ajanga metetdaksü.

ANP tiri ashiba agi, kiralongrartem tamangba yimsü kecha mali, kechiyong parnok ya meimchir anema lir aser teti atema raktoka intoktsü nüngdaker. "Sorkari national action plan benoker ali asübo iba amala kiralongraba maparen azüokteter lila," ta pai ashi.

Kasa mapang nung ANP tekolakbai ashiba agi, par party-i linük nung kiralongrartem

asüngsashiba indang sorkar nem metetdaksüogo, kechiyong linük kübok tesem balala nung kiralongrartem timtem adokdaksüba aiben ajangshia aruogo, saka yimsüsürtemi yimjung atema jenjang agitsü asoshi kecha süoki ia mebilemer.

Maneni QWP tekolakba Aftab Ahmad Khan Sherpao-i, opposition lenirtem aitsütsü atema sorkar rangloker inyaker aser parnok khuret abentsü mebilemer, ta ashiba den PTI sorkari parnok tenangzükba shidak meyutet.

Pakistan Democratic Movement (PDM)-i lokti senden tululu ayongzüka agiba ajanga yimsüsürtem anokshitsüogo aser ibayongji parnoki opposition party tem timtemdaksütsü atema mapa ajak idakji intoker, aser nüburtem kümzüka meyuteter, ta ashi.

Deobarnü Hazara Shia kin nungi nagmati atur 11 pur bener oa Balochistan province kübok Mach jila nung tepset.

Parnok ya prangpong agi teneter anir ao tepset ta osang balala ajanga metetdaksüogo. Parnok ya nagmati atudak anasa aliba hostel ka nungi pua bener oa tepset asütsü ta amanger.

Niger lendong nung asür nisung 100 jungogo: PM Rafini



Niamey, Aenjeti/January 04

(Agencies): Jihadist telok südi ta temolung melemteti aliba telok ajanga Honibarnü yimtsüng ana amakba nung asür nisung 100 jangjaogo, ta Niger ato kilonseri ashi.

Brigi Rafini-i ashiba agi, Tchombangou yimtsüng nung nisung 70 tepset aser Zaroumdareye yimtsüng nung nisung 30 tepset. Yimtsüng anaprong ya Mali den arrtsü anasa lir.

Niger nunger asoshi ibai anogo tamajungtuba rongnung ka liasü, kong kin balala tsüngta azüdokshi aser Islamist telungpuri timtem agütsüba agi sünger lir.

Saka telok kati iba lendong agütsüba tenüng agia mali.

Lendong agütsürtem ya motorcycle 100 shi nung senzüa liasü, ta yangji aliba mayor Almou Hassane-i AFP news agency dang ashi.

Parnok telok ana akum aser mapang kasa shi nung lendong ya agütsü.

Taoba mapang minister inyaka alisang Issoufou Issaka-i osangbener dang ashiba agi, yimtaklir temi jihadist züngsem ana tepsetba sülen parnoki lendong ya agütsü, saka iba osang ya tejangjabo masü.

Iba lendong nung yimtaklir 75 yirutsü aser parnok ya kar Ouallam aser linük yimtiba, Niamey nung temang anepalutsü anir ogo, ta Mayor Hassane-i ashi.

Ato Kilonser Rafini-i Deobarnü yimtsüng anaprong ya semdanga liasü.

"Iba tensa ya kanga majung lir... saka bushisüngdangtsü, kechiaser mapa tamajung inyaker memerenshi metoktsütsü," ta pai osangbener dang ashi.

(Maneni tapak 9 nung...)

Kiren Rijiju-i Shillong nung synthetic football ground ka lapoktsü

Shillong, Aenjeti/January 4 (Agencies): Union Minister of State for Sports and Youth Affairs - Kiren Rijiju-i Hombarnü Shillong nung Sports Authority of India (SAI) training centre nung synthetic football ground ka lapoktsüogo.

Kiren Rijiju-isa, SAI Training Centre nung synthetic athletic track aser field ground ka lapokja liasü. Sentong nung o jembiba mapang Rijiju-i, "tekübokba

jenjang nung sporting infrastructure ajungketba ya tarutsü nung saisapong tsütsü temaba jenjang tongtettsü atema jenjang ka lir," ta ashi.

Rijiju-isa, Shillong nung SAI Training Centre ya high altitude training camp ka kümdaktsütsü, ta ashi.

"Meghalaya, Shillong nung iba tebor tajung SAI Training Centre ya high altitude training camp ka kümdaktsütsü," ta Rijiju-i ashi.

Maneni Rijiju-i, Assam Rifles Public School (ARPS), Shillong nung Khelo India School ka lapokja liasü.

Iba Khelo India School ya Northeast nung mezüngbuba sports school asütsü.

Kasa mapang nung Meghalaya Chief Minister Conrad Sangma-i, Northeast nung sports infra ajungkettsüba atema Kiren Rijiju nem tenüngsang agütsü.

Airtel-i Prepaid Plan ka yanglushitsüogo

Aenjeti/January 4, 2021 (Agencies): Airtel-i, sen 199 alang 'truly unlimited' prepaid plan, 1.5GB daily internet data agi ajungkettsüogo. Iba prepaid plan tasenba ya Andhra Pradesh, Telangana, aser Karnataka amala teshimtet circle ka nungdang angutsü.

Taga tajangzüktem rongnung unlimited local aser STD calls, 100 SMS, Airtel Xstream streaming platform amshitsü, angati agi hello tunes, aser Wynk Music subscription densema lir. Iba plan memelenshi tsüngda anogo nung internet data GB 1 agüja liasü. Ajak ya anogo 24 atema amshitetsü.

Iba plan amshiba Airtel costumer tem dang 100 SMS quota tembangba sülen sen kaka agütsü. Anogo ka atema agütsüba 1.5 GB data amshimaba sülen Internet speed-a 64Kbps dang akümtsü. Iba plan tasenba anemokba sülen Airtel pur state

meyong BSNL (Bharat Sanchar Nigam Limited) aser Vi (taoba mapang Vodafone Idea) den tokteptsü imlar, shirnoki kasa jenjang nung prepaid plan kaka agütsüdar.

Sen 198 agi BSNL's Data STV plan ajanga anogo nung internet data GB 2 den angati Personalised Ring Back Tone (PRBT) agütsür. Iba ya data pack ka asünung unlimited calling benefit-bo magütsür. Kasa mapang nung Vi-i anogo shia data GB 1 agütsür aser iba den anogo nung SMS 100, unlimited local aser STD calls, aser access Vi Movies & TV amshitsü maongka agütsür. Iba plan ya circle ajak nung

angutsü.

Jangrademtsüjkaji Airtel indang sen 249 alang (28 days validity) prepaid plan balaka liasü, kong anogo nung internet data 1.5 GB agütsür. Tanga tajangzüktema sen 199 alang plan den mesükteper saka customer tem nem Shaw Academy online courses angati agütsür aser FASTag recharge nung cashback sen 100 agütsür.

Sen 199 aser 249 plan na tsüngda Airtel-i sen 219 alang pack ya agütsüdar, kong anogo nung data GB 1 anogo 28 atema agütsür. Tebandangji iba prepaid plan ya anogo 24 meleno anogo 28 amshiteter.

Manipur nung prangbong injang ngutet

Guwahati, Aenjeti/January 4 (Agencies): Assam Rifles (AR)-iDeobarnü Manipur kübok Tamenglong district nung prangbong injang aika ngutetogo.

Manipur police den longjemer meita aoba mapang Assam Rifles sepaitemi Tamenglong district, Nungba sub division kübok Nunag yimtsüng anasa prangbong

injang aika nguteta liasü.

Parnoki ngutetba prangbong injang ajak ya Imphal West Police station nung bendanga agütsüogo aser ken o maneni bushitsüngdangtsü.

Iba hadirtem ngutetba ya Assam Rifles asoshi takok tulu lir, shirnoki telungpurtem tasa tamajung raksatsütsü asoshi kanga meranga inyaka arudar.

Niger lendong...

(Tapak 8 nungi...)

Niger kübok Tillaberi region ya Niger, Mali aser Burkina Faso arrtsü tsüngta lir, kong küm aika jihadist temi lendong agüja arur. Iba region nung taoba ita Niger sepai tenet mita atar tepseta liasü.

Niger kübok tesem aika nung anasa aliba Nigeria nungi jihadist temi lendong agüja arur, kong sorkari Boko Haram telungpur telok den rarayonga arutar.

Azüdokshi ajemdaktsütsü meranga France-i anir West African coalition aser European linüktemi Sahel nung Islamist telungpur den rarar.

Saka item teloktem sepaitem dak tenük yoker aser taoba hopta Mali nung lendong ana ataloka France sepai pongu tepseta liasü.

Tir Mahamadou Issoufou küm pongu kümsük ana inyaker anenba sülen Niger nung election agiba mapang ka Tillaberi nung lendong ya atalok.

Election ketdangsürtemi Honibarnü osang sangdongba nung taoba mapang minister inyaka alisang aser tang Niger sorkar tenteta alidak züngsem, Mohamed Bazoum jenjang tajungba sayuogo.

Item vote ya linük indang constitutional court ajanga tejangja kumtsüba sülen tanabuba vote ya February 21 nü agütsü lir.

Küm 25 ajungba tepela



Mr & Mrs Lanuakum Longchar (5th January 1966 - 5th January 2021)

Temiem Oja aser Oba,

Nena kibong kümer küm Metsür Pongo (25) tashi tsüngremi arishi temjena moatsüba asoshi Tsüngrem tenüng asanger.

Maneni Tsüngremi ano nena taküm anema lia arishi talang moajang ta onoki sarasademtsür.

Temiem Chirnür

1st Death Anniversary

Late Mrs. Jemtikala Longchar (Changki)
5 / 1 / 2020 - 5 / 1 / 2021



Temeim Oja, na onok nungi pilar tanü küm ka ajungdang onoki na kanga menungra-a bilemteter. Nü mapa aser tsüngsü tajungtem bilemtetdang onok temoatsü angur.

Temeimba Kinungbo, Chirnurtem, in-laws aser Semchisemnur ajaki menungraseta Tsüngrem nem tenüngsang agüja sarasadema amonger.

NÜBURTEM DANG METETDAKTSÜR

Rising People's Party ta nüngja agütsür political party tasen ka tentettsü atema benokdanga lir, ta nüburtem nem metetdaktsür. Party office ya H.No. 202, Ground floor, Fellowship Colony, Dimapur-797112, Nagaland nung amenoka lir. Iba party yagi Election Commission of India, New Delhi nem, Representation of People Act, 1951 kübok Section 29A nung ajemdaker Political Party ka ama züngoksemtsü atema application agütsüogo. Party ketdangpurtem tenüng aser address yamai alitsü:

1. **President** : Mr. JOEL NAGA, R/o H. No. 202, Fellowship Colony, Dimapur-797112, Nagaland.
2. **General Secretary** : Mr. LUNGLY CHINGKHU, R/o Signal Angami Village, Dimapur-797112, Nagaland.
3. **Secretary** : Mr. LHIKHRO KREO, R/o H.No. 34, Bade Village, Dimapur-797112, Nagaland
4. **Treasurer** : Mr. VITHO ZAO, R/o Kacharigaong Village, Dimapur-797112, Nagaland

Rising People's Party züngoksemba dak sendakba nung tashishiba kar danga lira kuli dena Secretary (Political Party) Election Commission of India, Nirvachan Sadan, Ashoka Road, New Delhi-110001 dangi iba osang sangdongba sülen anogo 30 tsüngda yoktsü metetdaktsür.

MULUNGNEN O



ASO:
09.02.1974

ASÜ:
05.12.2020

Onoki teti meima aliba asür **Olangtetba** (Asangma village), nai onok toktsür oaka ne tongmelang aser ochi taküm onoki kodanga mamatsü.

Pa shirang yipden nungi asüko mapang tashi ana aser talang nungi shirnokisa nubu, rongsen, shsiatsü aser sarasadem agi ozü yariogo nenok ajak dang kanga pelaba metetdaktsür. Ozüi nenok nem kecha meyiba magütsütetsü saka tulusang Tsüngremi nenok ajak moajang ta ozü sarasadem.

Temeim kinüngtsü, chirnurtem, tsürapur aser kinüngertem

DECLARATION

Today, on this day, the 2nd January 2021, the Longkumer clan of Nokpu village in Dimapur and I, Mr. Yimlangchang of Nokpu village had a meeting.

The question of me and my offsprings using the title of Longkumer clan was thoroughly discussed. It was mutually understood that the use of Longkumer clan by me has no basis with reference to my family lineage.

Therefore, this declaration is made for all time to come that, I, Mr. Yimlangchang has wrongly used the title of Longkumer clan, which the Longkumer clan of Nokpu village in Dimapur condoned my confession of mistakes.

Henceforth, I, Mr. Yimlangchang and my descendents has no right/ basis to embrace the title of Longkumer clan in any official/ public documents.

I, being of sound mind, wilfully and voluntarily make this declaration.


(Mr. Yimlangchang)

Ronaldo-i Pele indang record ajangtetogo



Turin, Aenjeti/January 04, 2020: Deobarnü, Allianz Stadium, Turin nung Juventus aser Udinese na tsüingda Serie A asayadang Juventus' atema Cristiano Ronaldo-i goal idaktsüba yangi angur.

Turin, Aenjeti/January 04, 2021 (Agencies): Deobarnü Serie A asayamung nung Juventus aser Udinese na tsüingda asayaba mapang, Portugal nung Cristiano Ronaldo-i goal ana tashi idaktsüba den külemi pai Pele indang record ajateta goal timtiba idaktsür rongnung pa asayar tanabuba kümogo.

Iba asaya nung Juventus-i goal 4-1 agi Udinese akok, kong asaya mezüing aser tanabuba half nung Ronaldo-i pa indang goal 757buba aser 758buba idaktsü.

Goal ana densema Ronaldo-i taoba mapang Brazil nung striker Pele indang goal tally

ajangtetogo. Tang Juventus nungi striker asayasang Ronaldo-i club atema goal 656 aser national team atema goal 102 idakja goal 758 tongtetogo, koba Pele indang goal tally 757 (Club - 680 aser national team - 77) dang nungi goal kati timba alitsü.

Taoba küm Tom nung anioksang Federico Chiesa-ia Juve atema goal ka idaktsü, saka Cristiano Ronaldo-i goal ana tashi idakja record yangluba ang ajaki bulua jembitsür.

Asaya mezüing half nung, Ronaldo-i minute 31buba nung mezüing goal idaktsü aser tanabuba half tenzüker minute 4buba nung pa teyari ajanga

Federico Chiesa-i Juve indang goal tanabuba idaktsü.

Tang Ronaldo-i Pele indang record ajatetogo aser pa tejakdang Czech Republic nung Josef Biscan alitsü. Josef Bican indang goal tally meneptsü atema Ronaldo-i goal ka dang nungdaker aser taruba asaya nung pai ano iba record meneptsü imlar.

Club aser national team densema Ronaldo-i goal 758 tashi idaktsüba rongnung Real Madrid nung asayadang pai goal timtiba idakja lir. Taoba season 15 nung pai club aser national team atema goal 20 tashi idaktsüogo.

Sharath Kamal-i asayartem atema camp ayongzüktsür

Mumbai, Aenjeti/January 04, 2021 (Agencies): Coronavirus wara tenokdangba ajanga athlete aika tetoktepba asayamung nung shilem magiteti, pei pei kidang nungi parnok asaya dak sendakba nung renemshiba den külemi temang anepalua arudar. Iba ama mapang ka nung, training maneni agitsü asoshi athlete temi pei sasa asalentong balala yanglua camp tilala ayonga agidar.

Taoba küm tatemlen December 8 nü Sonepat nung India nung table tennis asayar takotet tem atema national camp tembanger, iba camp sülen tanga sentong kecha maliba asadangteta, India indang table tennis asayar mongin Sharath Kamal-i yimti ka nung table tennis asayar telok ka anidena training katsütsü asoshi tasa atongtet.

March ita international asayamung tenzüksütsü teimla nung aser iba ya magidang India nung table tennis tetoktepba asayamung balala metenzük tsüingda item asaya atema renemshitsü nükjidadong nung, Deobarnü National level nung table tennis asayar 4 tashi Chennai tonga aruogo. Tang Chennai nung Sharath-i ayongba camp ya anogo 10 agitsü ternemba lir.

Gujarat indang Manav Thakkar (U-21 world No. 1) aser Manush Shah, Telangana indang U-21 national champion Snehit Suravajjula aser Kolkata nungi Arjun Ghosh nung Sharath aser tanga asayar ishikati iba camp atema Chennai nung adenshitsü, koba January 13, 2021 nü tashi ayonga agitsü.

Tamil Nadu nungi world No. 99 Anthony Amalraj aser junior India No. 1 Vishwa Deenadayalan naprongla dena lir. Parnok ajak Jawaharlal Nehru Stadium indang table tennis hall nung training agitsü aser Chennai nung amenoka aliba fitness centre Sports Dynamix ajanga gym facility agitsütsü.

Asayartem mapang shitak nung anidena, Sports Development Authority of Tamil Nadu (SDATN) dang nungi camp tesem atema asüingdangyaba, tanga tesem nungi arur asayartem anenzüktsü asoshi temelaba agia aser tongtibangsa ajak kümzüka ayutsü asoshi camp telungtet nung Standard Operating Procedure (SOP) tem achaayanga renemtsü atema, arishi küm 38 tain



Sharath indang tasa ajunga mapa küma inyaktetogo.

"Local asayartem densema iba camp nung table tennis asayar nisung 10 agi shilem agitsü, koba tepor junga bentet benteta agitsü imlar," ta world No. 32 Sharath-i ashi.

"Iba camp ayongzüktsü asoshi ni SDATN dang mepishia aruogo. Kasa mapang, asaya renemshitsü asoshi ni TOPS (Target Olympic Podium Scheme) nung ketdangsürtem dang asüingdangogo. Ajasünung, camp ka ama asayartem renemshitsü atema nungdakba mera ajak agia inyakogo," ta pai shisem.

Iba coaching maparen ya Sharath tebu aser Dronacharya award angusang A Srinivasa Rao, uncle aser veteran coach Muralidhara Rao den adianu Rajath Kamal nungeri achaayangtsü.

"Iba camp asoshi tanga asayartem indang coach tem den senden ka amentsü," ta Sharath-i ashi.

Anogo 10 tashi ayongzüktsü aliba camp ya federation indang national camp (October tatemlen nungi December tashi ayongba) nungi ano maneni atongsema agitsü aser asayamung tenzüksüshidang renema alitsü aser tongtibangsa Tokyo Olympic qualifiers nung shilem agitsü nükjidadong yur ayongzüker.

"Covid-19 tenokdangba ajanga mapang talangka kecha meinyakteti arur sülen, national camp nung yimya tasen aika angazükogo; kasa mapang Diwali matong tsüingda 'footwork', 'technique' aser arakzüba yimyattem nung ajemdaker shilem agi aser Diwali sülen, service yokba yimyattem nung training agi. Tang iba camp nung asaya nung rangloker onok training agitsü," ta Sharath-i ashi.

Liverpool naklo ken atensang Marsden süogo

London, Aenjeti/January 04, 2021 (Agencies): 1960s mapang kentener telok "Gerry and the Pacemakers" indang frontman Gerry Marsden arishi küm 78 nung süogo, ta Deobarnü kentensang medemer Pete Price-i metetdaksü.


Liverpool nung soa intetsang Marsden, shiba mapang tatsüka shiranger sülen asü, 1960s mapang pai 'Rodgers and Hammerstein' ken "You'll Never Walk Alone" indang cover atenba ajanga nungtugu aküm, koba parnok indang musical Carousel nunga adokogo.

Liverpool FC fans temi 'Gerry and the Pacemakers' indang ken ya amshi, koba football naklo ken rongnung nungtugu naklo ken ka aküm.

Tanü tashi asaya metenzükdang aser tasayadak nung Liverpool pusemer temi "You'll Never Walk Alone" ken ya sapua tenteper.

Coronavirus tensa tamajungdang, Britain indang National Health Service nem akhüm agitsütsü asoshi 2020 kümApril ita Marsden-i iba ken tanaben record asü.

Nungtugu kentener telok The Beatles-i Liverpool pop music tongtibang küma



benshiba mapang, pai 1960s hit "Ferry Cross the Mersey" ken züluogo. Beatles' manager Brian Epstein ajanga Gerry and the Pacemakers telok iba maparen atema anioka liasü.

"Merseybeat" telok shilem ama, Gerry and the Pacemakers-isa parnok ken ajanga America nung music sapurtem atsüa aru.

Taoba mapang The Beatles nung kentensang, Paul McCartney-i twitter ajanga, "Liverpool nung Gerry ya tembar tajung ka liasü. Iba tesem nung music wadang tsütsü Marsden aser par telok den onok (The Beatles) tsüingda kanga toktepa aruogo," ta lemsatep.

"Alimai mamatetsüsa pai 'You'll Never Walk Alone' aser 'Ferry Cross the Mersey' ken junga tenogo aser British music tajung ka ama nübur mulung nung item ken teti alitsü," ta pai shisem.

"Gerry Marsden asüba osang angazüka onoki mangyim jashi lemsateper. Gerry indang mapa tajung onok mulung nung teti alitsü. 'You'll Never Walk Alone'," ta Twitter ajanga Liverpool football club-i lemsatep.

Borussia Dortmund, Feyenoord aser Scotland nung Celtic club densema tanga European football team indang fans temi iba nungtugu ken sapua amshia liasü.

Marsden'er tembar aser broadcaster Price-ia Instagram ajanga, "Marsden'er adianutem den jembiba sülen, temulung raksaa Gerry Marsden MBE asüba osang nenok den lemsateper. Pa temulungjang nung timtem adoka mapang tatsüka shirangba sülen iba akümli nungi pilaogo," ta metetdaksü.

Liverpool aser tanga nung charity maparen tsütsü bendanga agüja inyakba atema, 2003 küm Buckingham Palace nung Marsden-i MBE agizük.

BILEMDANGANG

"Merumerua inyakdang temenen menatsüsa meimchiri atongtetter."